

Reforme se provode zbog građana, a ne samo zbog Evrope

U svom obraćanju predsjednicima i premijerima iz Jugoistočne Evrope koji su se sastali danas u Sarajevu, visoki predstavnik je istakao da svaki element u opsežnom programu reformi, svaki zakon, svaki bilateralni sporazum i svaka institucionalna promjena donosi korist građanima.

“Proces evropskih integracija zahtijeva fokus. Zahtijeva disciplinu i političke, ekonomske i socijalne transformacije. A to znači teške odluke i izbor. Ali, svrha svega je da se ove reforme trebaju provesti ne zbog Evrope već zbog vaših građana.”

“Ne radi se o ispunjavanju zahtjeva koje postavljaju birokrate u Briselu”, rekao je visoki predstavnik. “Radi se o daljem nastavku aktivnosti kako bi se osigurali mir, sigurnost i bolji život za građane. Građani u zemljama ovog regiona imaju koristi od uvođenja modernog i pravednog poreskog sistema, primjene standarda Evropske unije u radu policijskih snaga, učvršćivanja vladavine zakona i demokratije koja se istinski zasniva na zastupljenosti svih naroda u organima vlasti.”

Visoki predstavnik se obratio prisutnima na Sedmom samitu šefova država i vlada zemalja članica procesa za saradnju u Jugoistočnoj Evropi.

Navodeći saopštenje Evropske komisije koja je u utorak objavila da je Hrvatska uspješno ispunila kriterije za početak pregovora sa Evropskom unijom, visoki predstavnik je istakao: “Hrvatska je pokazala da ono što je bitno nisu riječi, niti koja je stranka na vlasti, ni ko jeste i ko nije u vladi, već je bitna samo jedna stvar – djela i reforme. Pokazala je da

Evropa nije nedostižni san za zemlje koje je donedavno potresao rat u bivšoj Jugoslaviji, već stvarna mogućnost koja ih čeka ako smo spremni da poduzmemo neophodne reforme.”

Visoki predstavnik je dodao i da je “Evropa pokazala da ozbiljno shvata ovaj region, a sada je na zemljama kao što je Bosna i Hercegovina da slijede primjer Hrvatske. Svojom jučerašnjom odlukom, Evropa je pokazala da je istinski opredjeljena za region. A jedna od većih zemalja u regionu je pokazala da je zaista opredjeljena za Evropu.”

Visoki predstavnik je istakao i da “nema ulaska u Evropu sve dok režim materijalno ili politički podržava osobe koje su optužene za ratne zločine. Nema ulaska u Evropu ako pravimo kompromise oko provedbe evropskih standarda. Nećemo uspjeti ako, kod pitanja kao što je obrazovanje nastavimo vjerovati da su lažne zaštite iz prošlosti bolja opcija za očuvanje naše kulture i ljudskih prava nego što su zaštite koje se nude u okviru evropske budućnosti.”

Visoki predstavnik je pohvalio Predsjedništvo BiH i Ministarstvo vanjskih poslova za uspješno predsjedavanje procesom saradnje u Jugoistočnoj Evropi tokom prošle godine. Dodao je i to da odvijanje inicijativa regionalne saradnje u borbi protiv kriminala i ekonomske saradnje postaje sve intezivnije “zahvaljujući predsjedavanju BiH u ovom procesu”.